

# UNIVERSITÂT DAL FRIÛL - Furlan in prin plan tal cors par permiti a 60 di lôr di insegnâ in lenghe Master par diventâ mestris

LISA ZANCANER

**I**nsegnâ in lenghe furlane. Al è chest il titul dal Master par furlan che l'Universitât e à burît fûr in colaborazion cul l'Agjenzie regionâl pe lenghe furlane e cu la volontât pandude dai conseis des facultâts di Lenghis e literaturis forestis e des Siencis de formazion.

“Chest Master - e displee **Alessandra Burelli** co-diretore dal Master - al nàs daspò une domande dal Arlef, l'Agjenzie regionâl pe lenghe furlane par screâ un percors formatif che al vès un titul universitari. Cheste iniziative no je gnove - e marche - ma e à a code une lungje tradizion de bande de Universitât e cun chest Master o rispundin a une esigence no a une polemiche” e ten a di, daspò lis tantis polemichis su la mancjançe di mestris preparâts par insegnâ in marilenghe. Chest Master che al met il furlan in prin plan tant che lenghe vive e moderne, al previôt un percors complet cun tre areis di formazion: linguistiche, culturâl e metodologiche-didatiche; cussì i mestris di doman a varàn un profil di insegnant par furlan come i mestris des altris lenghis europeanis. Il Master difat al previôt une vore di cors de Linguistiche furlane ae letierature, de geografie regionâl ae storie dal Friûl e ancjemò didatiche dal furlan, storie de lenghe furlane, etnografie e tradizions culturâls, antropologie e sociologie dal Friûl cun tant di laboratoris di scritture furlane e di educazion linguistiche. Il cost de iscrizion al è di 250 euros, un piçul investiment che di sigûr al tornarà bon par chei che a vuelin sielzi cheste strade tal mont dal furlan e che a varàn la passion ma soledut la pacience di tornâ sui bancs di scuele par podê, plui indenant, pandi la lenghe furlane cheste volte sentâts daûr di une catidre.

## Par cui e cemût

Il Master - Cors di inzornament al intint furnî ai insegnants e educadôrs che



Alessandra Burelli



La presentazion dal gnuf master

a lavorin te scuele de infanzie, primarie e secondarie une schirie di cognossincis culturâls, sientifichis, linguisticis, didaticis e di competencis operativis di fonde, par doprâ la lenghe furlane in forme veicolâr tal davuelziment des ativitâts e des disciplinis previodudis dai curricula scolastics e par disvilupâ une salde competence plurilengâl e pluriculturâl tai arlêfs.

Il profil professionâl che si larà a definî al è chel di un docent bon di planificâ e di davuelzi l'insegnament de lenghe furlane integrant il svilup de competence linguistiche cu la maturazion di cognossincis disciplinâr, di capacitâts operativis e di une efetive competence plurilengâl e pluriculturâl. Al Master, che al previôt no plui di 60 puecscj, a puedin notâsi ducj chei che a àn un titul di lauree magiistrâl o une lauree di vecjo ordenament o un diplome di scuele secondarie superiôr e che tal moment de presentazion des domandis di amission a dimostrin di jessi o di jessi stâts formalmentri in servizi in struturis educativis e, naturalmentri, a àn di dimostrâ di savê cjararâ la marilenghe.

“La precedence - e conte la **Burelli** - e vende prin di dut a 20 personis che a insegnin te scuele de infanzie, 20 te primarie e 20 te scuele secondarie; in chest ultin câs si va daûr de leç regionâl 29 dal 2007 che e previôt ativitâts in lenghe furlane ancjetes scuclis superiôrs”.

A conclusion dal Master, a ducj i iscrirts che a vedin seguît lis ativitâts e superât la prove finâl, al vignarà dât il titul di Master universitari di secont nivel in

“Insegnâ in lenghe furlane”. A chei che a vedin adempît ai oblics didatics previodûts e superât la prove finâl, al vignarà dât un attestât di frecuence, daûr dal articulo 74 dal Regolament didatic dal Ateneu, pal Cors di inzornament “Insegnâ in lenghe furlane”.

Lis domandis a varàn di rivâ dentri dai 7 di Avrîl ae Ripartizion didatiche, sezion servizis ai students e ai laureâts, in vie Mantica. Il Master - cors di inzornament, ativât pal an academic 2007-2008, de durade di 21 mès pal valôr di 60 credits formatifs universitariis, al scomençarà ae fin di Avrîl 2008 e si serrarà tal Dicembar 2009 disvilupantsi in dôi ciclis di lezion frontâls e di laboratoris.

La frecuence aes ativitâts e je obligatorie e e covente par otignî il titul di Master-Cors di inzornament. Lis lezionis, pe plui part, si davuelzaran a Udin, dôs voltis par setemane tal dopomisdì tes struturis de facultât di Siencis de formazion in vie Margreth.

## La presentazion

Joiibe ai 3 di Avrîl, in ocasion de “Fieste de Patrie dal Friûl” - che e ricuarde i 931 agns de costituzion dal Stât patriarcjâl furlan dai 3 di avrîl dal 1077 a palaç Antonini, si è davuelt l'incuintri public di presentazion dal Master universitari di II nivel - cors di inzornament “Insegnâ in lenghe furlane”.

Si son passâts la peraule la Retore de Universitât **Maria Amalia D'Aronco**, il preside de facultât di Siencis de formazion **Franco Fabbro** e chel de facultât di Lenghis e literaturis forestis **Antonella Riem** e ancjemò il diretôr dal Arlef **Massimo Duca**, il diretôr dal Silce - Servizi identitât linguisticis e coregionâls tal forest **Marco Stolfo**, la direttore dal Master **Piera Rizzolatti** e il diretôr gjenarâl dal Uffici scolastic regionâl **Ugo Panetta**.